



Broj: 05/1-50-15-26-78-4/21

Sarajevo, 18. 1. 2021.

IZVJEŠTAJ

**o radu Nezavisnog odbora kao nezavisnog tijela policijske strukture Bosne i
Hercegovine za 2020. godinu**

Januar 2021. godine

SADRŽAJ

POGLAVLJE I. UVODNE NAPOMENE	3
POGLAVLJE II. NADLEŽNOSTI NEZAVISNOG ODBORA	4
POGLAVLJE III. IZVRŠAVANJE ZADATAKA IZ NADLEŽNOSTI NEZAVISNOG ODBORA.....	4
 Odjeljak A. Realizacija zadataka održavanjem redovnih sjednica Nezavisnog odbora..	5
 Odjeljak B. Realizacija zadataka održavanjem sastanaka s rukovodiocima policijskih tijela BiH u skladu s Planom rada za 2020.	10
 1. Posjeta Graničnoj policiji BiH 8. 6. 2020.	11
 2. Posjeta Državnoj agenciji za istrage i zaštitu 6. 7. 2020.	12
 3. Posjeta Direkciji za koordinaciju policijskih tijela BiH 25. 8. 2020.	13
POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA.....	14
POGLAVLJE V. ADMINISTRATIVNO-TEHNIČKA PODRŠKA RADU.....	15
POGLAVLJE VI. PREPORUKE I ZAKLJUČCI.....	15

Na osnovu člana 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine i člana 9. tačka e) Poslovnika o radu Nezavisnog odbora kao nezavisnog tijela policijske strukture Bosne i Hercegovine, Nezavisni odbor je na 78. sjednici, održanoj 18. 1. 2021, usvojio i Parlamentarnoj skupštini Bosne i Hercegovine podnosi sljedeći

I Z V J E Š T A J

o radu Nezavisnog odbora kao nezavisnog tijela policijske strukture Bosne i Hercegovine za 2020. godinu

POGLAVLJE I. UVODNE NAPOMENE

Nezavisni odbor osnovan je Zakonom o nezavisnim i nadzornim tijelima policijske strukture Bosne i Hercegovine ("Službeni glasnik BiH", broj 36/08), kao nezavisno tijelo Parlamentarne skupštine BiH.

Nezavisni odbor ima devet članova koji su imenovani na mandat od četiri godine odlukom Parlamentarne skupštine BiH ("Službeni glasnik BiH", br. 20/14 i 53/17), i to:

1. Tatjana Klječanin-Martić, predsjednica Nezavisnog odbora,
2. Enes Obraliija, prvi zamjenik predsjednice Nezavisnog odbora,
3. Mato Jozić, drugi zamjenik predsjednice Nezavisnog odbora,
4. Adisa Begić, članica Nezavisnog odbora,
5. Ilma Mehić-Jusufović, članica Nezavisnog odbora,
6. Nikola Džambas, član Nezavisnog odbora,
7. Mate Miletić, član Nezavisnog odbora,
8. Ljubomir Kuravica, član Nezavisnog odbora,
9. Vladimir Jurišić, član Nezavisnog odbora.

- Dopisom broj: 01,02,05/1-34-1-1382/18 od 7. 6. 2018. predsjednica Nezavisnog odbora Tatjana Klječanin-Martić podnijela je Zahtjev za razrješenje dužnosti člana Nezavisnog odbora kao nezavisnog tijela policijske strukture BiH.

Dom naroda Parlamentarne skupštine BiH je na 41. sjednici, održanoj 27. jula 2018, donio Odluku o razrješenju dužnosti člana Nezavisnog odbora kao nezavisnog tijela policijske

strukture BiH Tatjane Klječanin-Martić, dok Predstavnički dom Parlamentarne skupštine BiH navedeni zahtjev nije razmatrao.

POGLAVLJE II. NADLEŽNOSTI NEZAVISNOG ODBORA

Nezavisni odbor je, u skladu sa Zakonom o nezavisnim i nadzornim tijelima policijske strukture BiH i Poslovníkom o radu Nezavisnog odbora, nadležan za provođenje procesa odabira kandidata i predlaganje smjenjivanja policijskih rukovodilaca i zamjenika rukovodilaca policijskih tijela BiH; objavljivanje javnih konkursa i razmatranje prijava kandidata, vršenje odabira i dostavljanje ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH, predlaganje smjenjivanja rukovodilaca i zamjenika rukovodilaca policijskih tijela BiH, ako su počinili krivično djelo, osim za krivična djela iz oblasti sigurnosti saobraćaja, ili ako počine tešku povredu službene dužnosti, kao i u slučaju ako utvrdi da ne postižu odgovarajuće rezultate, razmatranje pritužbi na rad rukovodilaca i zamjenika rukovodilaca policijskih tijela BiH i obavještanje o tome ministra sigurnosti BiH i Vijeće ministara BiH, iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH, obradu podataka i vođenje evidencije u skladu sa zakonom i drugim propisima i ostale poslove propisane zakonom, Poslovníkom o radu i drugim propisima.

POGLAVLJE III. IZVRŠENJE ZADATAKA IZ NADLEŽNOSTI NEZAVISNOG ODBORA

Osnovna nadležnost Nezavisnog odbora je provođenje procesa odabira kandidata za rukovodioce i zamjenike rukovodilaca policijskih tijela BiH, te u vezi s tim objavljivanje javnih konkursa i razmatranje prijava kandidata, vršenje odabira i dostavljanje ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH.

Nezavisni odbor je u toku 2020. godine redovno održavao komunikaciju s rukovodiocima policijskih agencija po svim bitnim pitanjima iz njihovog djelokruga, s posebnim naglaskom

na aktivnosti koje su policijska tijela preduzimala u vezi s događanjima koja su izazivala veću medijsku pažnju.

Osim ove nadležnosti, Nezavisni odbor nadležan je i za predlaganje smjenjivanja rukovodilaca i zamjenika rukovodilaca policijskih tijela BiH, te iniciranje pokretanja disciplinskih postupaka protiv rukovodilaca policijskih agencija BiH.

Odjeljak A. Realizacija zadataka održavanjem sjednica Nezavisnog odbora

U izvještajnom periodu Nezavisni odbor održao je 11 redovnih sjednica na kojima je ukupno razmatrano 38 tačaka dnevnog reda i 3 podtačke.

Broj i datum održavanja sjednice	Broj razmatranih tačaka dnevnog reda na sjednici	Broj prisutnih članova sjednicama Nezavisnog odbora	Broj članova koji nisu bili prisutni sjednicama Nezavisnog odbora	Zakazivane pa otkazivane sjednice iz objektivnih razloga
67. / 28. 1. 2020.	3	8	1	
68. / 11. 2. 2020.	3	8	1	
69. / 9. 3. 2020.	3	8	1	
70. / 26. 5. 2020.	4	8	1	
71. / 8. 6. 2020.	3	8	1	
72. / 6. 7. 2020.	4	7	2	
73. / 28. 8. 2020.	5	8	1	
74. / 8. 9. 2020.	3	8	1	
75. / 6. 10. 2020.	3	8	1	
76. / 10. 11. 2020.	3	7	2	
77. / 8. 12. 2020.	4	8	1	

Nezavisni odbor je na sjednicama razmatrao pitanja iz svoje nadležnosti, od kojih izdvajamo:

Na 67. sjednici Nezavisnog odbora, održanoj 28. 1. 2020, razmatran je Prijedlog izvještaja o radu Nezavisnog odbora Parlamentarne skupštine Bosne i Hercegovine kao nezavisnog

tijela policijske strukture Bosne i Hercegovine za 2019. godinu koji je nakon rasprave jednoglasno usvojen.

Razmatrana je i anonimna predstavka kao i dopis Pravobranilaštva BiH po predmetu Nj. J. Nezavisni odbor je, također, na istoj sjednici usaglasio da od policijskih agencija za koje je nadležan zatraži izvještaje o radu za 2019. godinu i planove rada za 2020. godinu.

Na 68. sjednici Nezavisnog odbora, održanoj 11. 2. 2020, razmatran je Izvještaj o radu Državne agencije za istrage i zaštitu za 2019. godinu i Program rada Državne agencije za istrage i zaštitu za 2020. godinu koje je rukovodstvo Državne agencije za istrage i zaštitu dostavilo Nezavisnom odboru u skladu s dogovorom sa 67. sjednice. U vezi s tim, na sjednicu je pozvan i prisustvovao joj Đuro Knežević, zamjenik direktora Državne agencije za istrage i zaštitu, kako bi s članovima Nezavisnog odbora razmatrao dostavljeni materijal.

U raspravi o ovoj tački dnevnog reda i razgovoru članova Nezavisnog odbora sa zamjenikom direktora Državne agencije za istrage i zaštitu učestvovali su svi prisutni članovi Nezavisnog odbora. Razgovarali su o trenutnom stanju u Državnoj agenciji za istrage i zaštitu, problemima s kojima se susreću u radu, kadrovskoj popunjenosti, o nacionalnoj strukturi zaposlenih u ovoj policijskoj agenciji, akcijama koje su uspješno proveli i okončali u prethodnom periodu i značajnim rezultatima koje su ostvarili, o saradnji s drugim policijskim agencijama u BiH.

Nakon rasprave, članovi Nezavisnog odbora jednoglasno su primili k znanju Izvještaj o radu Državne agencije za istrage i zaštitu za 2019. godinu i Program rada Državne agencije za istrage i zaštitu za 2020. godinu.

Na 69. sjednici Nezavisnog odbora, održanoj 9. 3. 2020, razmatran je Izvještaj o radu Granične policije BiH za 2019. godinu i Prijedlog programa rada Granične policije BiH za 2020. godinu koje je rukovodstvo Granične policije BiH dostavilo Nezavisnom odboru u skladu s dogovorom sa 67. sjednice. U vezi s tim, na sjednicu su pozvani direktor Granične policije BiH Zoran Galić i zamjenik direktora Granične policije BiH Fahrudin Halač. Međutim, Nezavisni odbor je pismenim putem obaviješten da je direktor Granične policije BiH iz zdravstvenih razloga spriječen da prisustvuje sjednici Nezavisnog odbora.

U raspravi o ovoj tački dnevnog reda i razgovoru članova Nezavisnog odbora sa zamjenikom direktora Granične policije BiH o dostavljenom materijalu učestvovali su svi prisutni članovi Nezavisnog odbora. Razgovarali su o trenutnom stanju u Graničnoj policiji BiH, problemima

s kojima se susreću u radu, migrantskoj krizi, kadrovskoj popunjenosti, izmjenama Zakona o policijskim službenicima, materijalno-tehničkim sredstvima kojima raspolažu, saradnji s graničnom policijom zemalja s kojima dijelimo graničnu liniju, saradnji s drugim policijskim agencijama u BiH, kao i s Tužilaštvom BiH.

Nakon rasprave, članovi Nezavisnog odbora jednoglasno su primili k znanju Izvještaj o radu Granične policije BiH za 2019. godinu i Prijedlog programa rada Granične policije BiH za 2020. godinu.

Razmatrane su i dvije anonimne predstavke, od kojih jedna nije u nadležnosti Nezavisnog odbora a drugu je Nezavisni odbor nakon razmatranja stavio *ad acta*.

Na 70. sjednici Nezavisnog odbora, održanoj 26. 5. 2020, razmatran je Izvještaj o radu Direkcije za koordinaciju policijskih tijela BiH za 2019. godinu i Prijedlog programa rada Direkcije za koordinaciju policijskih tijela BiH za 2020. godinu koje je rukovodstvo Direkcije za koordinaciju policijskih tijela BiH dostavilo Nezavisnom odboru u skladu s dogovorom sa 67. sjednice. U vezi s tim, na sjednicu su pozvani i prisustvovali joj direktor Direkcije za koordinaciju policijskih tijela BiH Mirsad Vilić i zamjenici direktora Direkcije za koordinaciju policijskih tijela BiH Ivica Bošnjak i Ranko Vuković kako bi s članovima Nezavisnog odbora razmatrali dostavljeni materijal.

U raspravi o ovoj tački dnevnog reda i razgovoru članova Nezavisnog odbora s direktorom i zamjenicima direktora Direkcije za koordinaciju policijskih tijela BiH učestvovali su svi prisutni članovi Nezavisnog odbora.

Razgovarali su o trenutnom stanju u Direkciji za koordinaciju policijskih tijela BiH, problemima s kojima se susreću u radu, o značajnim aktivnostima koje su imali u proteklom periodu kao što su: osiguranje najvećeg sportskog olimpijskog festivala za mlade – EYOF, Sarajevo Business forum, posjeta predsjednika Vlade Republike Sjeverne Makedonije, posjeta predsjednika Republike Hrvatske i Slovenije, osiguranje komemoracije u Srebrenici i mnoštvo drugih posjeta u kojima je Direkcija za koordinaciju policijskih tijela BiH imala koordinirajuću ulogu sa sigurnosnog aspekta. Dalje, razgovarano je i o Zakonu o policijskim službenicima BiH i nužnosti njegove izmjene, neusklađenosti Zakona o penzijskom i invalidskom osiguranju Federacije BiH i Republike Srpske, kadrovskoj popunjenosti u Direkciji za koordinaciju policijskih tijela BiH, materijalno-tehničkim sredstvima kojima

raspolažu, saradnji s drugim policijskim agencijama u BiH, saradnji s EUFOR-om i OSCE-om.

Nakon rasprave, članovi Nezavisnog odbora jednoglasno su primili k znanju Izvještaj o radu Direkcije za koordinaciju policijskih tijela BiH za 2019. godinu i Prijedloga programa rada Direkcije za koordinaciju policijskih tijela BiH za 2020. godinu.

Razmatrana je i jedna predstavka za koju je Nezavisni odbor odlučio staviti *ad acta*.

Na 71. sjednici Nezavisnog odbora, održanoj 8. 6. 2020, razmatrana je usmena informacija Adise Begić i Mate Miletića, članova Nezavisnog odbora, koji su 8. 6. 2020. posjetili Graničnu policiju BiH i sastali se s njenim rukovodstvom. Dogovoreno je da se izvještaj o posjeti pripremi za narednu sjednicu Nezavisnog odbora.

Na 72. sjednici Nezavisnog odbora, održanoj 6. 7. 2020, članovi Nezavisnog odbora jednoglasno su usvojili Izvještaj sa sastanka članova Nezavisnog odbora s rukovodstvom Granične policije BiH od 8. 6. 2020. Razmatrana je i usmena informacija Ilme Mehić-Jusufbašić, Mate Miletića i Ljubomira Kuravice, članova Nezavisnog odbora, koji su 6. 7. 2020. posjetili Državnu agenciju za istrage zaštitu i sastali se s njenim rukovodstvom. Dogovoreno je da se izvještaj o posjeti pripremi za narednu sjednicu Nezavisnog odbora.

Na 73. sjednici Nezavisnog odbora, održanoj 25. 8. 2020, članovi Nezavisnog odbora jednoglasno su usvojili Izvještaj sa sastanka članova Nezavisnog odbora s rukovodstvom Državne agencije za istrage zaštitu od 6. 7. 2020. Razmatrana je i usmena informacija Enesa Obralije, prvog zamjenika predsjednice Nezavisnog odbora, Mate Miletića i Ljubomira Kuravice, članova Nezavisnog odbora, koji su 25. 8. 2020. posjetili Direkciju za koordinaciju policijskih tijela BiH i sastali se s njenim rukovodstvom. Dogovoreno je da se izvještaj o posjeti pripremi za narednu sjednicu Nezavisnog odbora.

Također, utvrđeno je i izjašnjenje po tužbi Nj. J. protiv Nezavisnog odbora koje je, na njihov zahtjev, dostavljeno Pravobranilaštvu BiH.

Na 74. sjednici Nezavisnog odbora, održanoj 8. 9. 2020, članovi Nezavisnog odbora jednoglasno su usvojili Izvještaj sa sastanka članova Nezavisnog odbora s rukovodstvom Direkcije za koordinaciju policijskih tijela BiH. Dalje, dogovoreno je da se na sljedeću

sjednicu Nezavisnog odbora pozovu direktor i zamjenik direktora Državne agencije za istrage i zaštitu.

Na 75. sjednicu Nezavisnog odbora, održanu 6. 10. 2020, u skladu s dogovorom s prošle sjednice, pozvani su i prisustvovali joj Darko Čulum, direktor Državne agencije za istrage i zaštitu, i Đuro Knežević, zamjenik direktora Državne agencije za istrage i zaštitu. Razgovarali su o trenutnom stanju u Državnoj agenciji za istrage i zaštitu, problemima s kojima se susreću u radu, kadrovskoj popunjenosti, nacionalnoj strukturi zaposlenih u ovoj policijskoj agenciji, o Zakonu o policijskim službenicima, saradnji s drugim policijskim agencijama kao i s Tužilaštvom BiH. Kada je u pitanju saradnja s drugim policijskim agencijama, direktor je istakao da su posebno na raspolaganju Graničnoj policiji BiH za pomoć u vezi s migrantskom krizom, te da im je uvijek na raspolaganju 10-15 policijskih službenika.

Na 76. sjednicu Nezavisnog odbora, održanu 10. 11. 2020, bili su pozvani i potvrdili dolazak direktor i zamjenici direktora Direkcije za koordinaciju policijskih tijela BiH. Međutim, u međuvremenu su putem e-maila obavijestili Nezavisni odbor o tome da zbog bolesti direktora i jednog zamjenika direktora nisu u mogućnosti prisustvovati sjednici s prijedlogom da se sjednica odgodi. Dogovoreno je da se direktor i zamjenici direktora Direkcije za koordinaciju policijskih tijela BiH ponovo pozovu na sljedeću sjednicu Nezavisnog odbora.

Također, dogovoreno je da se za sljedeću sjednicu Nezavisnog odbora pripremi prijedlog Plana rada Nezavisnog odbora kao nezavisnog tijela policijske strukture Bosne i Hercegovine za 2021. godinu.

Na 77. sjednicu Nezavisnog odbora, održanu 8. 12. 2020, u skladu s dogovorom s prošle sjednice, pozvani su i prisustvovali joj: Mirsad Vilić, direktor Direkcije za koordinaciju policijskih tijela BiH, te Ivica Bošnjak i Ranko Vuković, zamjenici direktora Direkcije za koordinaciju policijskih tijela BiH. Razgovarali su o trenutnom stanju u Direkciji za koordinaciju policijskih tijela BiH, problemima s kojima se susreću u radu, Sporazumu o međusobnom pružanju pomoći i operativnoj saradnji u borbi protiv terorizma koji je potpisan između Obavještajno-sigurnosne agencije BiH, svih policijskih agencija u BiH i Službe za poslove strancima, učešću policijskih službenika Direkcije za koordinaciju policijskih tijela BiH u aktivnostima u vezi s lokalnim izborima 15. 11. 2020. u BiH sa sigurnosnog aspekta, o

Zakonu o policijskim službenicima BiH, saradnji s drugim policijskim agencijama, Ministarstvom sigurnosti BiH kao i s Tužilaštvom BiH. Kada je u pitanju saradnja s drugim policijskim agencijama, direktor je istakao da su posebno na raspolaganju Graničnoj policiji BiH za pomoć u vezi s migrantskom krizom, te da su im na raspolaganju u Višegradu i Bijeljini.

Razmatran je i Prijedlog plana rada Nezavisnog odbora kao nezavisnog tijela policijske strukture Bosne i Hercegovine za 2021. godinu koji je nakon rasprave jednoglasno usvojen.

Dalje, Nezavisni odbor razmatrao je i primio k znanju dopis Pravobranilaštva BiH kojim ovom tijelu dostavljaju presudu Suda BiH kojom je tužba Nj. J. protiv Nezavisnog odbora u potpunosti odbijena kao neosnovana.

Odjeljak B. Realizacija zadataka održavanjem sastanaka s rukovodiocima policijskih tijela BiH u skladu s Planom rada za 2020. godinu

Planom rada Nezavisnog odbora za 2020. godinu predviđeno je održavanje pojedinačnih sastanaka s rukovodstvom Direkcije za koordinaciju policijskih tijela BiH, Državne agencije za istrage i zaštitu i Granične policije BiH. Cilj ovih sastanaka je uvid u rad i upoznavanje s problemima s kojima se u radu susreću rukovodioci policijskih agencija BiH. Nezavisni odbor obavlja zadatke iz svoje nadležnosti i putem izvještaja o radu koji dostavlja Parlamentarnoj skupštini BiH na razmatranje i usvajanje informira je o problemima u radu policijskih agencija BiH iz svoje nadležnosti.

Nezavisni odbor je u 2020. godini, u skladu s članom 18. Poslovnika o radu Nezavisnog odbora i Planom rada Nezavisnog odbora za 2020. godinu, obavio posjete:

Posjete	Datum posjeta
Graničnoj policiji BiH	8. 6. 2020.
Državnoj agenciji za istrage i zaštitu	6. 7. 2020.
Direkciji za koordinaciju policijskih tijela BiH	25. 8. 2020.

1. Graničnoj policiji BiH, 8. 6. 2020.

Sastanak članova Nezavisnog odbora kao nezavisnog tijela policijske strukture BiH sa Zoranom Galićem, direktorom Granične policije BiH, Fahrudinom Halaćem, zamjenikom direktora Granične policije BiH i Draganom Kulićem, pomoćnikom direktora za organizaciju i operacije održan je 8. 6. 2020. u prostorijama Granične policije BiH. U ime Nezavisnog odbora sastanku su prisustvovali Adisa Begić i Mate Miletić, članovi Nezavisnog odbora, te Ivana Lovrić, sekretarka Nezavisnog odbora.

Direktor Granične policije BiH na početku je istakao da su s aspekta sigurnosti granične linije imali veliku ulogu kada je u pitanju COVID-19. U početnoj fazi su, shodno odlukama Vijeća ministara BiH, prilagođavali službu i policijske službenike na terenu. U tom poslu pomagali su im i službenici Uprave za inspekcijske poslove kojima su ustupili svoje prostorije na graničnim prijelazima.

Kad su u pitanju migranti, direktor je istakao da je za vrijeme vanrednog stanja u BiH, a radi pandemije virusa, znatno manji broj migranata ušao u zemlju u odnosu na isti period prošle godine, ali zadnjih 20-ak dana intenzitet se pojačava. Istakao je da je najkritičnije na istočnoj granici (Zvornik, Višegrad i Bijeljina) te su veliki broj policijskih službenika usmjerili na te granične prijelaze. Naveo je da su samo jučer policijski službenici vratili više od 200 migranata s granice. Ako se migrant uhvati, veliki problem predstavlja i nemogućnost utvrđivanja njegovog identiteta. Istakao je i to da su tražili izmjene Zakona o graničnoj kontroli, u smislu podizanja ovlaštenja graničnim policajcima, ali od nadležnih institucija nisu dobili podršku. Direktor je, također, istakao da najveći broj migranata dolazi iz Pakistana, Maroka i Egipta, da je Sirija na 7. mjestu kao zemlja koja je pogođena ratnim dejstvima, te da se u velikom broju slučajeva radi o ekonomskim migrantima.

Kada je riječ o kadrovskoj popunjenosti i zaposlenim u ovoj policijskoj agenciji, direktor je naglasio hitnost rješavanja problema nedostatka policijskih službenika. Istakao je da su prije tri godine radili reformu Pravilnika o unutrašnjoj organizaciji i sistematizaciji radnih mjesta, kojom se predviđalo da se smanji broj rukovodećih službenika, a poveća broj službenika na terenu. Međutim, taj prijedlog nije prošao resorno ministarstvo. Trenutno rade na novom pravilniku prema standardima Evropske unije kojim bi trebalo da imaju 1.200 policijskih službenika. Naglasio je da je trenutno jedan policijski službenik na 25 kilometara granične linije.

Dalje, istakli su da su od IPA fondova osigurali 2,5 miliona KM za prijem 300 kadeta (250 policijskih službenika i 50 inspektora), ali se čeka Vijeće ministara BiH koje bi trebalo donijeti odluku o prijemu da bi se krenulo u proceduru. Novčana sredstva bi trebala biti operativna u septembru.

U razgovoru s članovima Nezavisnog odbora rukovodstvo Granične policije osvrnulo se i na međuljudske odnose unutar ove policijske agencije kao i na anonimne pritužbe koje su nerijetko pristizale i Nezavisnom odboru. Istakli su da svaka anonimna predstava koja pristigne prolazi provjeru unutrašnje kontrole.

Dalje u razgovoru direktor je naglasio da ima korektnu saradnju s drugim policijskim agencijama u BiH i Tužilaštvom BiH.

2. Državnoj agenciji za istrage i zaštitu, 6. 7. 2020.

Sastanak članova Nezavisnog odbora kao nezavisnog tijela policijske strukture BiH sa zamjenikom direktora Državne agencije za istrage i zaštitu održan je 6. 7. 2020. u prostorijama Državne agencije za istrage i zaštitu. U ime Nezavisnog odbora sastanku su prisustvovali: Ilma Mehić-Jusufović, Mate Miletić i Ljubomir Kuravica, članovi Nezavisnog odbora, te Ivana Lovrić, sekretarka Nezavisnog odbora.

Zamjenik direktora Državne agencije za istrage i zaštitu Đuro Knežević naglasio je da je ova policijska agencija od decembra 2019. godine bez direktora, te da on od tada obavlja njegove poslove. Reкао je kako je prvih šest mjeseci ove godine obilježila pandemija koronavirusa (COVID-19), te da su se u tom periodu u agenciji pridržavali instrukcija koje je donosilo Vijeće ministara BiH. Osiguravali su, a i danas osiguravaju, sve neophodne mjere za zaštitu svojih zaposlenih, te su sredstvima koja su im bila na raspolaganju nabavljali zaštitnu opremu (maske, rukavice, vizire) i dezinfekciona sredstva.

Što se tiče zaposlenih u ovoj policijskoj agenciji, zamjenik direktora istakao je da popunjenost iznosi oko 80%, tj. agencija ima 763 zaposlenika. Od toga je 563 policijskih službenika, 71 državni službenik i 133 zaposlenika. U 2020. godini u penziju je otišlo sedam zaposlenih: pet policijskih i dva državna službenika. Također, istakao je da je u 2020. godini primljeno osam policijskih službenika u činu policajca, a da je u toku prijem deset mlađih inspektora, pet državnih službenika i šest zaposlenika, dok je unaprijeđeno 36 policijskih službenika.

Zamjenik direktora Državne agencije za istrage i zaštitu informirao je članove Nezavisnog odbora o Zakonu o Državnoj agenciji za strage i zaštitu, navodeći da je Zakon trenutno u proceduri u Parlamentarnoj skupštini BiH. Također, informirao je članove Nezavisnog odbora o trenutnim aktivnostima kada je u pitanju izrada Zakona o policijskim službenicima BiH, čiji je tekst usaglašen i upućen u daljnju proceduru. Dotakao se i donošenja novih propisa za izradu Instrukcije o kriminalističko-obavještajnom i istražnom radu.

Također, istakao je da je formirana radna grupa za izradu novog Pravilnika o unutrašnjoj organizaciji i sistematizaciji radnih mjesta.

Upoznao je članove Nezavisnog odbora o trenutnim aktivnostima i rezultatima rada u oblasti privrednog kriminala, terorizma, ratnog zločina i ostalih pitanja u vezi sa zaštitom tajnih podataka iz djelokruga ove policijske agencije.

U daljnjem razgovoru, zamjenik direktora Državne agencije za istrage i zaštitu informirao je članove Nezavisnog odbora da je zadovoljan odnosima s drugim policijskim agencijama u BiH kao i s Tužilaštvom BiH.

3. Direkciji za koordinaciju policijskih tijela BiH, 25. 8. 2020.

Sastanak članova Nezavisnog odbora kao nezavisnog tijela policijske strukture BiH s direktorom Direkcije za koordinaciju policijskih tijela BiH Mirsadom Vilićem, zamjenicima direktora Direkcije za koordinaciju policijskih tijela BiH Ivicom Bošnjakom i Rankom Vukovićem održan je 25. 8. 2020. u prostorijama Direkcije za koordinaciju policijskih tijela BiH. U ime Nezavisnog odbora sastanku su prisustvovali: Enes Obralića, prvi zamjenik predsjednice Nezavisnog odbora, Mate Miletić i Ljubomir Kuravica, članovi Nezavisnog odbora, te Ivana Lovrić, sekretarka Nezavisnog odbora.

Direktor Direkcije za koordinaciju policijskih tijela BiH upoznao je članove Nezavisnog odbora o značajnim aktivnostima koje su imali u proteklom periodu, s posebnim osvrtom na osiguranje komemorativnog skupa u Srebrenici 11. 7. 2020. Direktor je istakao da je ove godine broj zvanica koje su prisustvovala komemoraciji znatno manji u odnosu na prethodne godine a zbog pandemije COVID-19. Sama komemoracija je, sa sigurnosnog aspekta, protekla na profesionalnom nivou, u najboljem redu i bez ijednog incidenta.

U razgovoru s članovima Nezavisnog odbora direktor je istakao problem nedostatka velikog broja policijskih službenika u Direkciji za koordinaciju policijskih tijela BiH. Naglasio je da u ovom trenutku prema Pravilniku o unutrašnjoj organizaciji i sistematizaciji radnih mjesta nedostaje oko 400 policijskih službenika. Početkom godine imali su prijem 50 policijskih službenika, a u planu je u narednom periodu od Ministarstva sigurnosti BiH tražiti saglasnost za još 50 policijskih službenika. Također, direktor je istakao da je u proteklom periodu izvršeno činovanje policijskih službenika, i to: tri glavna inspektora i 12 viših inspektora.

Također, razgovarano je i o problemima s kojima se susreću, a posebno su istakli problem neujednačenog obračuna penzija za zaposlene koji dolaze iz Republike Srpske i one koji dolaze iz Federacije BiH.

Dalje, direktor je istakao da je period od početka godine pa sve do danas obilježila pandemija koronavirusa (COVID-19), da provode sve neophodne mjere za zaštitu svojih zaposlenih, te da su sredstvima koja su im bila na raspolaganju nabavljali zaštitnu opremu (maske, rukavice, vizire) i dezinfekciona sredstva.

Rukovodstvo Direkcije za koordinaciju policijskih tijela BiH naglasilo je da ima izuzetno dobru saradnju sa ostalim policijskim agencijama u BiH, a posebno su naglasili saradnju s Graničnom policijom BiH koja, također, ima problem nedostatka policijskih službenika, te Direkcija za koordinaciju policijskih tijela BiH, u skladu sa svojim mogućnostima, šalje svoje policijske službenike na državnu granicu, a s ciljem njene zaštite zbog migrantske krize. Istakli su i veoma dobru saradnju s Tužilaštvom BiH kao i Obavještajno-sigurnosnom agencijom BiH.

POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA

Rad Nezavisnog odbora pratili su predstavnici OHR-a. Sve sjednice Nezavisnog odbora pratili su i zaposleni u Sektoru za odnose s javnošću Sekretarijata Parlamentarne skupštine BiH te predstavnici medija u BiH. Javnost se može upoznati s radom Nezavisnog odbora i putem akata koje je ovaj odbor usvajao i putem zapisnika, jer su objavljeni na internetskoj

stranici Parlamentarne skupštine BiH. Na ovaj način osigurana je transparentnost rada Nezavisnog odbora.

POGLAVLJE V. ADMINISTRATIVNO-TEHNIČKA PODRŠKA RADU

Zajednička služba Sekretarijata Parlamentarne skupštine BiH je, prema Zakonu o nezavisnim i nadzornim tijelima policijske strukture u BiH, zadužena da pruža svu administrativno-tehničku podršku radu Nezavisnom odboru. Zajednička služba osigurala je potrebne uslove za rad Nezavisnog odbora angažiranjem stručnog osoblja, ali i osiguravanjem materijalno-tehničkih i drugih uslova za nesmetan rad.

POGLAVLJE VI. PREPORUKE I ZAKLJUČCI

Nezavisni odbor realizirao je većinu programskih aktivnosti planiranih u 2020. godini, a u skladu sa Zakonom o nezavisnim i nadzornim tijelima policijske strukture Bosne i Hercegovine.

Nezavisni odbor predlaže Parlamentarnoj skupštini BiH da usvoji Izvještaj o radu Nezavisnog odbora kao nezavisnog tijela policijske strukture u BiH za 2020. godinu.

**PRVI ZAMJENIK PREDSJEDNICE
NEZAVISNOG ODBORA**

Enes Obralića

PRILOG: Tabela prikaz održanih sjednica i prisustvo članova Nezavisnog odbora u 2020. godini